

AOB

[GIZONAK GORPUTZA DARO]

Gizonak gorputza daroa,
ezer baino lehenagotik daroa gorputza
ezer baino urbilagotik nabari du
gorputzaren arazo askotarikoa.
Gorputzak inguratzen du gizona
eta gorputzean bizi da lehenik.
Gorputzean bizi du gizonak gosea ta egarria,
seksuaren irrikia,
ase ezinaren gaitza
ta ase nahiaren antsia.

Gizonak gorputza daroa.
Gorputza du gizonak
burua hartzen diona.
Gorputzak bizi dio
gizona lurreraino
erasten duen nekea.
Gizona ustekabea
iraultzen duen aldartea
gizona oldarrez
jasotzen duen sasoi.

Gorputzaren ontzian
kulunkatzen da gizona.
Gorputzaren kriseiluan
kiribiltzen da bizi nahiz
gizonaren sutargia.
Gorputzaren lurrean
hotzitzen da poza.

Gizonak gorputzean
daki bere kondaira
Behazunaren ur berdea
geldi gabe ari zaio
lur gozoa erretzen
erretenak irikitzen
mami guztiak zehar.

Ganbara bazterrean
berakatzei bezala
ernemina sortzen zaio gizonari
zil-begi orotatik
eta hoitatik hustu doa
ganbarako ilunetan
berakatzak bezala.